

Phawuloosi Filmoonas Xaafida Kiitaa Gaatha Qofa

Filmoonni eretida ammaniya asi. I Qolaasiyasa woosa keetha asi gidonna attenna. Filmoonas Anasmoosa geetetiya aylley de7ees. He aylley ba godaape betidi bida wode qasho keethan de7iya Phawuloosara gahetis. Anasmoosi Yesuusa ammanana mela oothiday Phawuloosa. Phawuloosi, Filmoonas xaafida dabdaabey, Filmoonni guye simmidi, iyako biya ba aylliyara sigetana mela akeekisees. Gujidika ha77i Anasmoosi ammaniya asi gidida gisho, hizape guye, ammaniya ishada iya mokidi ekana melape attishin, aylleda iya taybonna mela iyaw odees.

Maxaafa Ayfe Qofata

Sarotho (1-3)

Anasmoosa gisho Phawuloosi Filmoona woossi (4-22)

Sarothonne anjo (22-25)

¹ Taani Phawuloosi, Yesuus Kiristoosa gisho qashon de7eysinne nu ishaa Ximotiyoosi, nuura oothiya nuuni dosiya Filmoonas,

² ne son shiiqiya woosa keethatas, nu miche Afbiyaasinne nuura issife de7iya wotaadare Arkiphaasas xaafida kiita.

³ Xoossaa nu Aawapenne nu Godaa Yesuus Kiristoosape aadho keehatethaynne sarotethay hintew gido.

Filmoona Siiquwanne Ammanuwa

⁴⁻⁵ Neeni geeshshata doseysanne Godaa Yesuusa ammaneyya taani si7iya gisho, Xoossaa woossashe nena qopiya wode ubban ta Xoossaa galatayis.

⁶ Neeni ne ammanuwa haratas shaakeysi nuus Kiristoos Yesuusa baggara yaa lo77oba ubbaa erisana mela taani Xoossaa woossayis.

⁷ Geeshshata wozanay ne oosuwan minnida gisho, ta ishaw, taani ne siiquwan daro ufaysinne minthetho demmas.

Phawuloosi Filmoona Woossees

⁸ Hessa gisho, neeni oothanaw bessiyaba oothana mela nena kiittanaw Kiristoosa baggara taw minotethay de7ees.

⁹ Taani, cimay Phawuloosi, Kiristoos Yesuusas ha77ika qashon de7eyisi, siiqon nena woossayis.

¹⁰ Taani qashon de7ashe iyaw zoriya aawa giddada ta na7aa Anasmoosa gisho nena woossayis.

¹¹ I kase nena maaddenna, shin ha77i nenaka tanaka tuma maaddiya asi.

¹²⁻¹³ Taani wozanape dosiya Anasmoosa neeko yeddayis. Taani Wongela gisho qashetidashin, ne gisho taw oothidi tana maaddana mela ta matan iya ashshanaw koyas.

¹⁴ Shin ne sheneda oothanaw koyasipe attishin, neera zorettonna wolqan aykoka oothanaw koyke.

¹⁵ Anasmoosi guutha wode neepe shaaketidaysi, ooni eri simmidi ubba wode neera de7onna aggenna.

¹⁶ Hiza, haysafe guye Anasmoosi ayye gidonashin, ayye I daro aadhees. I taw ay mela siiqo ishe! Qassi I new asa baggaraka Godaa baggaraka aadhida isha.

¹⁷ Hiza, neeni tana ne lagge giyaba gidiko tana mokeysada iya moka.

¹⁸ I nena qohidabay woyko I acotidabay de7iko taape eka.

¹⁹ He acuwa ta qanxana gada taani Phawuloosi, ta kushen xaafayis. Neeni taw ne shempuwa acota uttidaysa taani nena akeekisanaw koshshenna.

²⁰ Ta ishaw, Godaa baggara neepe maade demmanaw koyayis. Kiristoosa baggara tana minthetha.

²¹ Taani gidaysafe daro neeni oothanaysa erada qassi ne taw kiitetanaysa ammanada haysa xaafayis.

²² Xoossay hinte woosa si7idi tana hinteko guye zaarana gada qopiya gisho, taw imathi shempiya keethi giigisa.

Sarotho

²³ Kiristoos Yesuusa gisho taara qashon de7iya Ephafiri nena saro saro gees.

²⁴ Qassi taara issife oothiya Marqoosi, Arsxirokoosi, Deemasinne Luqaasi nena saro goosona.

²⁵ Godaa Yesuus Kiristoosa aadho keehatethay hinte ayyaanara gido.

Geeshsha Maxaafa
Gofa: Geeshsha Maxaafa (Bible) for Ethiopia, Latin
script

copyright © 2024 The Word for the World International

Language: Goofa (Gofa)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

cd247997-ca42-596b-9d91-94ffba4675ef